

Tutu ni tee Pablo nuu ñayiu ka skua'a ñuu Colosas

¹ Maa san kuu Pablo tee ni chitniuu ña Jesukristu, ja sa'a san nagua kuini maa ia Dios, ka tee san tutu ya'a jin ñanio Timoteo, ² nuu maa ni, vi ñani vi kua'a, ja ka kuu ni ñayiu maa ia Dios ja ka sa'a ndaa ni nuu Jesukristu ja ka oo ni ñuu Colosas. Te maa Tata Yuao jin Jito'o Jesukristu na chindee chituu ña, te vi koo ni jin jamani ya.

Ka ndakuatu Pablo ja ja'a ñayiu ka skua'a

³ Siun ni ka ndakuanta'u san nuu ia Dios, nuu ka ndakuatu san ja ja'a ndi'i maa ni, nuu Tata maa Jito'o Jesukristu, ⁴ chi ni ka jini so'o san ja ka kandija gua'a ni Jesukristu, te ka ka'an too ni ndi'i ñayiu maa ya. ⁵ Chi ka ndetu ka'nu ni nagua ni tava'a ia Dios andivi ja taa ya, guaa ndee nuu ni ka jini so'o ni tno'o va'a Jesús ja kuu tno'o ndaa. ⁶ Te tno'o ya'a ni ka kaxtno'o nuu ndi'i ni, nagua ni ka kaxtno'o nuu ñayiu nii ñuyiu, te kua'i ni ka kandija gua'a, te mavikayai, nagua ka sa'a maa ni ja ka kandija gua'a ni, te mavikaya ni ndee kiuu xtnañu'u nuu ni ka onini ni, te ni ka jini ni ja oo ndaa ja chindee chituu ña ia Dios. ⁷ Te saa ni ka kutua'a ni nuu ni kaxtno'o Epafras, tee ka ka'an too san ja ka jinokuechi san jin de nuu Jesukristu, in tee ndaa ja chituu ña de jin ni, ⁸ te suni suu de ni ndakani nuu san ja ka ka'an too ni ñayiu sa'a Espíritu ia Dios.

⁹ Te yun guaa suni sein, chi guaa ndee kiuu ni ka onini san tno'o ya'a, te ni tu ka jinkuiin san ja ka ndakuatu san ja ja'a ndi'i ni. Te ka jikan san nuu ia Dios ja vi kuni guagua'a ni nagua kuini ya ja vi sa'a ni, te na taa Espíritu ya ndi'i tno'o ndichi vi ja vi jinkui'nu ini ni, ¹⁰ nagua ja vi kaka ndaa ni, nagua kanuu ja vi kaka ñayiu maa Jito'o, te vi sa'a ni ndi'i nagua junkuaan ini ya, te vi sa'a vii vi sa'a va'a ni jin ndi'i tniuu ka sa'a ni, te ndi joo ndi joo vi kuni gua'a ka ni ia Dios. ¹¹ Te vi koyutnu ni jin jaka'nu maa ya, chi ia ka'nu ndeva'a kuu ya, nagua ja vi kuandee ini ni jin taka tnundo'o, te vi koka'nu anu ni. ¹² Te vi kosii ini ni nuu ka ndakuanta'u ni nuu Tata Dios, ja ni sa'a tua'a ña ya jion ja vi ni'o ja skuta'u ya ñayiu maa ya ja vi koi nuu ye'e ni'nu ya. ¹³ Te ni ndatau ña ia Dios nuu tatnuni Tachi nuu ñunee, te ni ndasia'a ña ya nuu tatnuni Se'e ya, ia kutoo ndeva'a ya. ¹⁴ Te maa Se'e ya ni tniuya'u yika kuechio jin niñi ya nuu ni ji'i ya ja koneka'nu ini ia Dios yika kuechio.

Ka ndumanio jin ia Dios jin ma'ñu sagua ja ni ji'i Jesukristu

¹⁵ Te Se'e ya Jesukristu kuu ia ja vi kaa ya nagua oo nagua kaa maa Dios, ia tu jinio jin nduchi nuu, te Se'e ya kuu ia ka'nu ka saa ndi'i ja ni sa'a ya. ¹⁶ Chi jin ma'ñu sagua Se'e ya ni jinkoo ndi'i ja oo nuu ñu'u ja ndia'o jin nduchi nuu, vi ndi'i ja oo andivi ja tu kuu kondia'o, na kuinio nuu mesa ja tatnuni, vi ja kuu nija'nu ka na kuinio ndi'i ja vaji nuu Tachi vi ja na'nu, ni sa'a ya jin ma'ñu sagua Se'e ya ja vi kunukuechi

nuu ya. ¹⁷ Te Se'e ya, chi ja oo ya ama ka ja jinkoo ndi'i ja oo ñuyiu, te maa ya yituu ja ndi'i oo yukun. ¹⁸ Te Se'e ya kuu yiki xini in yiki kuñu ja ka kuu ñayiu ka skua'a ja ka kui veñu'u maa ya. Te suu Se'e ya kuu ia ka'nu ka ja ni ndateku xtnañu'u ya ne'u ndiyi, te yun guaa maa ya kuu ia ka'nu ka nuu ndi'i. ¹⁹ Chi saa ni junkuaan ini Tata Dios ja ndi'i naxa oo ya ja kuu ya Dios, te saa oo Se'e ya. ²⁰ Te jin ma'ñu sagua Se'e ya ni ndaka'an va'a ya ndi'i kuiti ja oo ñuyiu, ndi'i ja oo nuu ñu'u vi ja oo andivi, chi ni ndumani ya jin ma'ñu sagua niñi Se'e ya ja ni jati nuu ni ji'i ya nuu cruz.

²¹ Te suni saa ni maa ni, ama ka, chi ni ka ojika ndoñu'u ni nuu ia Dios, te ni ka ojini u'u ni ya nuu ni ka ondakani kue'e ini ni, te ni ka osa'a ni tniuu kue'e, su vitna te ni ndaka'an va'a ña ya ²² jin ma'ñu sagua yiki kuñu Se'e ya ja ni soko ya nuu ni ji'i ya, nagua ja vi koo vii ni, te tu na yika kuechi ni vi koo ja ka'an kuechi ia Dios siki ni nuu nusia'a ña Se'e ya nuu ya. ²³ Te yun guaa vi koo gua'a ni, te vi koo yutnu ni jin ja ka kandija ni, te ma vi kujioo ni nuu tno'o va'a Jesús ja ka ndetu ka'nu ni, nagua ni ka jini so'o ni. Te suu tno'o ya'a ka kaxtno'o nuu ñayiu nii ñuyiu, te suni saa kaxtno'o maa san ja kuu san Pablo ja jinokuechi san nuu ia Dios.

Ni chitniuu ña Jesukristu jin Pablo ja kunukuechi de nuu ñayiu ka skua'a

²⁴ Vitna te kusii ini san ja tna'a san tnundo'o ja ja'a in in ni, chi saa te skunkuu san jin yiki kuñu san ndi'i tnundo'o ja ja'ni ña jin san, nagua ni

teku tniuu san nuu Jesukristu ja ja'a ñayiu ka skua'a ja ka kui yiki kuñu maa ya. ²⁵ Te ni jani ña ia Dios jin san ja jinokuechi san nuu ñayiu ka skua'a, chi ni chitniuu ña ya ja skunkuu san kaxtno'o san tno'o va'a ya, ja kuu java'a in in maa ni. ²⁶ Chi ndakani ndi'i san tno'o ja ni oyu'u ndee kuia ja ni ya'o guaa ndee ja nana'a yun, su vitna te ni xne'e kaji ya nuu ñayiu maa ya. ²⁷ Te nuu ñayiu ya'a kuini ia Dios ja xne'e ya nagua ja vi kuni tno'o va'a ya nuu ka'an ja suni ñayiu masu judio ka kui vi ni'i javii java'a ya ja kuu tno'o ni oyiyu'u, te tno'o ya'a kuu Jesukristu, ia oo ini anu in in maa ni. Te yun guaa ka ndetu ka'nu ni ja vi koo ni jin ya nuu ye'e tajan.

²⁸ Te suu tno'o Jesukristu kuu ja ka ndakani san vi ka xteku san nuu ñayiu nuu ka kaxtno'o kaji san ndi'i tno'o ndichi nuu ndi'i ñayiu, nagua ja ndi'i vi kokui ñayiu ndaa ja ka oi jin Jesukristu. ²⁹ Te siki ya'a kuu ja satniuu san nuu ia Dios vi nduku ndee ndeva'a san, chi jin jaka'nu maa Jesukristu kuu ja chindee chituu ña jin san.

2

¹ Chi kuini san ja vi kuni ni ja nduku ndee ndeva'a san ja ja'a in in maa ni, vi ja ja'a ñayiu ka kandija ja ka oo ñuu Laodicea, vi suni ja ja'a sava ka ñayiu ja tu na ama ka jini ña jin san, ² nagua ja na vi nukundee ini ni, te inuu inuu vi ka'an too tna'a ni, vi guaa ndee na vi ni'i ni ja vi jinkui'nu guagua'a ini ni nagua ja vi kuni kaji ni tno'o maa Tata Dios ja ni oyiyu'u, te suu kuu maa Jesukristu. ³ Chi nuu maa ya oo ndi'i kuiti tno'o va'a vi tno'o ndichi vi ja jinkui'nu ini.

⁴ Te tno'o ya'a kaxtno'o san nagua ja ni in ñayiu ma vi xnda'u ña jin tno'o luu ndeva'a ja ka ka'in. ⁵ Chi visi tu san oo nuu ka oo ni, su ñu'u ini ña san, te oo sii ini san nuu jini san ja inuu inuu ka oo ni vi ka kandija yutnu ni Jesukristu. ⁶ Te yun guaa naxa ni ka janta'u ni Jesukristu ja kuu ya Jito'o, te saa vi kaka ni jin ya. ⁷ Te vi koo gua'a ni na kuinio in yutnu ja oo kunu yo'o tnu, te nukuiin yutnu tnu, te saa vi koyutnu ni nagua ni ka kandija ni nuu ni ka kaxtno'o nuu ni, te siun ni vi kondakuanta'u ni nuu ia Dios.

Ni ka ndujao nuu Jesukristu

⁸ Te vi koto va'a ni maa ni ja ma vi xnda'u ña ñayiu jin ma'ñu sagua tno'o ndichi axi tno'o vixin ja tu jiniu'u, axi tno'o ja ka kandija ñayiu, su masu tno'o Jesukristu kuu, chi nino'o ni tno'o ja ka kaxtno'o ñayiu ja oo ñuyiu kuu. ⁹ Chi ndi'i nagua oo ia Dios, te saa oo Jesukristu nuu ni oo ya ñuyiu ya'a. ¹⁰ Te maa ni, chi tu nagua ja'ni ña jin ni nuu ia Dios, chi ka oo ni jin Jesukristu, te maa ya kuu ia ka'nu ka saa ndi'i jana'nu ja vaji nuu Tachi vi jatatnuni.

¹¹ Te suni maa ni ja ka oo ni jin Jesukristu, ni ka jinkitnuni ni, su masu nagua ka sa'a teyii judio ja ka chitnuni de jin nda'a de inka teyii, chi nuu ni kindee Jesukristu yika kuechi in in maa ni, te yun kuu nuu ni chitnuni ña ya. ¹² Chi nuu ni ka jandute ni, te ni ka jinkoyu'u ni jin Jesukristu nuu ndute. Su nuu ni nanakuei ni nuu ndute yun, te ni ka ndateku ni jin ya. Saa ni kuu, chi ka kandija ni jaka'nu maa ia Dios ja ni ndaxteku Jesukristu ne'u ndiyi.

¹³ Chi ndee ama ka na tno'o ni ka ji'i ni nuu yika kuechi ni, chi masu ñayiu maa ia Dios ni ka okuu ni, te tu ni ka oyitnuni nuu yiki kuñu ni, su vitna te ni sa'a ia Dios ja ka teku ni jin Jesukristu, chi ni jaka'nu ini ya ndi'i yika kuechi ni. ¹⁴ Chi na kuinio ja oo in acta ja ka'an kuechi sikio ja tu ka skunkuo tno'o tatnuni ia Dios, su na kuinio ja ni nda'va ia Dios tno'o yoso yun nuu ni tniuya'u Jesukristu ja ja'o nuu ni ji'i ya nuu cruz. ¹⁵ Te ni xtajioo ia Dios ndi'i jana'nu vi jatatnuni ja vaji nuu Tachi, te ni jiña'a ya jakanoo nuu ni ka jini kua'a ñayiu nuu ni kundee ya siki ndi'i yun jin ja ni sa'a Jesukristu nuu cruz.

Vi nduku ni nagua oo andivi

¹⁶ Te yun guaa ma vi kuandetú ni ja vi ka'an kuechi ñayiu siki ni jin nagua ka jaa ni axi nagua ka ji'i ni axi ja tu ka jaan ii ni kiuu viko axi kiuu ndayoso jaa yoo axi kiuu ndatatu. ¹⁷ Chi ndi'i ya'a kuu na kuinio kuanda'u ia kii, su ia xiin kuanda'u yun kuu maa Jesukristu, ia ni kii. ¹⁸ Te ma vi kuandetú ni ja vi kindee ñayiu ja vi kuta'u ni nuu ia Dios, nuu ka sa'i na kuinio ja ka sa'a nda'u ka sa'a kei mai vi ka chiñu'i ia ka jinokuechi nuu Dios. Te ka ka'in ja ia Dios ni skuni ña jin, guaa ka sa'a teyii ndeva'i jin jajintnuni mai. ¹⁹ Te tu ka netna'i jin Jesukristu ja kuu ya yiki xini, te maa ya sa'a ja ka jija ni'nu ñayiu ka skua'a nagua sa'a yiki xini ja netna'a tuchi jin yiki kuñu, te suu sa'a ja xteku yiki kuñu ja ja'nu, chi saa kuini maa ia Dios ja vi kua'nu.

²⁰ Chi na kuinio ja ni ka ji'i ni jin Jesukristu ja ma vi sa'a ka ni ndi'i nagua ka sa'a ñayiu ñuyiu.

¿Te nau ja vitna te ka sa'a ni ni na kuinio ñayiu ñuyiu, te ka kandija ni ka sa'a ni nagua ka ka'in 21 nuu ka ka'in: "Ma kuantniuu ni jaya'a, ni ma kaa ni jajian, ni ma ke'e ni jayun"? 22 Te ndi'i ya'a, chi nani ja naa ni kuu nuu jantniuo axi nuu jao, te nino'o ni ja ka xtaku ñayiu ñuyiu kuu vi tno'o ja ka kaxtno'i sua'a ni kuu. 23 Te jandaa ja tno'o ya'a, chi vi koka'on ja tno'o ndichi ka kaxtno'o ñayiu kuu, chi ka sa'i ja vi nii ini ka chiñu'i ya, te ka sa'i ja ka sa'a nda'ui mai, vi ka xndo'o ndeva'i yiki kuñui, su tu nagua jiniu'u sa'un ja vi junkanio ja ka jio'o nuu ñuyiu ya'a.

3

1 Te maa ni ja siun ni ka ndateku ni jin Jesukristu, vi nduku ni nagua oo andivi nuu oo Jesukristu ja nukoo ya nda'a kua'a maa ia Dios. 2 Te vi ndioo ini ni nagua oo ndee sukun yun, te ma vi ndioo ini ni nagua oo ñuyiu ya'a. 3 Chi na kuinio ja ni ka ji'i ni jin Jesukristu, te ja ka tekuni jin ya oo va'a nuu ia Dios. 4 Te Jesukristu kuu maa ia taa ja ka tekuni, te kiuu na ndenta ya, te suni ndentakuei ni jin ya, te vi koo ni jin jaka'nu ndeva'a ya.

Vi sa'a ni java'a te ma vi sa'a ka ni jakue'e

5 Te vi kani ini ni ja na tno'o ni ka ji'i ni jin ndi'i jakue'e ni ka osa'a ni ñuyiu ya'a. Te yun guaa ma vi sa'a ni kuechi ñuyiu jin inka ñayiu, ni ma vi sa'a ni taka jatne'e, ni ma vi sa'a ni taka ja jikan yiki kuñu ni, ni ma vi kojio'o ni in taka jakue'e, ni ma vi kondioo ini ni ja vi koneva'a kua'a ni xu'un, chi ndi'i jayun kuu na kuinio in chu'chi ja

vi chiñu'u ni. ⁶ Te siki ya'a guaa kiti ini ia Dios, te yun guaa tetniuu ya tnundo'o xeen siki ñayiu ja ka kuso'o nuu ya. ⁷ Te suni saa ni ka ojika maa ni ama ka nuu ni ka osa'a ni jakue'e yun. ⁸ Su vitna te suni vi xndoo ni ndi'i jakue'e ya'a: Tno'o kiti ini vi tno'o xeen vi ja ka ndakani kue'e ini ni, vi ja ka nani ni ñayiu, vi tno'o kue'e tno'o sua'a ja ka ka'an ni. ⁹ Te ma vi xnda'u tna'a ni, chi ja ni ka xndoo maa ni ndi'i jakue'e ja ni ka osa'a ni ndee ama ka. ¹⁰ Chi na kuinio ja ni ka nduu ni ñayiu jaa, te ndi joo ndi joo sama ña ia Dios jin ni guaa ndee na kentakuei ni ja vi kuni gua'a ni naxa oo Dios, ia ni sa'a ña jin ni. ¹¹ Te yun guaa tu ni ja sa'i nuu ia Dios a ñayiu judio axi masu ñayiu judio ka kuu ni, a ñayiu ka yitnuni nuu yiki kuñu axi ñayiu tu ka yitnuni ka kuu ni, a ñayiu ñuu na'nu axi ñayiu ñuu kueli ka kuu ni, a ñayiu ka jinokuechi nuu lamu axi ñayiu tu ka jinokuechi ka kuu ni. Chi Jesukristu kuu Jito'o nuu ndi'i, te maa ya oo jin ndi'i maa ni.

¹² Chi kutoo ña ia Dios, te ni ndakaji ña ya ja ka kuu ni ñayiu ñuu maa ya. Te nuu saa te vi kunda'u ini ni ñayiu, te vi kova'a ini ni, te vi sa'a nda'u vi sa'a kee ni maa ni, vi koo luu ini ni, te vi koka'nu anu ni, ¹³ vi kuandee nuu tna'a ini ni, te vi kuaka'nu ini ni nuu ja ndee in ni ka'an kuechi siki inka ni, nagua ni jaka'nu ini Jesukristu yika kuechi maa ni, te suni saa ni vi koneka'nu ini ni. ¹⁴ Te tno'o kanuu ka kuu ja vi ka'an too tna'a ni, chi suu sa'a ja vi kotutu ndi'i ni jin ja ka sa'a ni. ¹⁵ Te jamani maa ia Dios na kotatnuni ini anu in in maa ni, chi yun kuu ja ni ndakana ña ya, te ndi'i ni vi kokuu ni invaa ni

ñayiu, te vi ndakuanta'u ni nuu ya. ¹⁶ Te tno'o maa Jesukristu na koo kua'a ini anu in in maa ni, te jin ndi'i tno'o ndichi maa ya vi kaxtno'o nuu tna'a maa ni, te suni vi xteku tna'a ni. Te vi kata ni yaa ja vaji nuu salmo vi yaa ja ndakuanta'u nuu ia Dios vi yaa ja ndakakune'e maa ya, ja ka ndakuanta'u ni nuu ya ndi'i ndee ini ndee anu ni. ¹⁷ Te ndi'i nani guaa kuu ja ka sa'a ni vi tno'o ka ka'an ni, vi sa'a ni ndi'i jin sivi maa Jito'o Jesús, ja ka ndakuanta'u ni nuu Tata Dios jin ma'ñu saga maa Jesús.

Tno'o kanuu ja vi skunkuu nuu tna'a ñayiu ka skua'a

¹⁸ Te maa ni ja ka kuu ni ñasi'i ja ka ndeka tna'a ni, vi kuanyu'u vi kuandetuni ni nuu yii ni, chi yun kuu tniuu ja vi sa'a ni, ja ka kandija ni Jito'o Jesús. ¹⁹ Te maa ni ja ka kuu ni teyii ja ka ndeka tna'a ni, vi kokutoo ni ñasi'i ni, te ma vi kokuxeen vi kokuu u'u ni nuu ña. ²⁰ Te roon ja ka kuu ron se'e, vi kuantno'o nuu tata ron vi nuu nana ron jin ndi'i nagua ka ka'an, chi yun kuu ja junkuaan ini Jito'o Jesús ja vi sa'a ron. ²¹ Te maa ni ja ka kuu ni yua, ma vi koskiti ini ni se'e ni, nagua ja ma vi kuu kui'a ini nagua ka sa'i.

²² Te maa ni ja ka jinokuechi ni, vi kuantno'o ni ndi'i nagua ka tatnuni jito'o ni ja ka oo ñuyiu. Ma vi satniuu vixin ni maintno'o nuu ka ndia'a de, nagua ja na vi kee yiñu'u ni nuu de, chi vi satniuu ni ndi'i ni jin anu ni nuu de ja ka yu'u ni'nu ni Jito'o. ²³ Te ndi'i ni ja ka sa'a ni, vi sa'a sii ini ni jin anu ni, vi kani ini ni ja nuu Jito'o Jesús ka sa'a ni, masu nuu ñayiu ñuyiu. ²⁴ Chi ja ka jini ni ja maa Jito'o taa ya in ja vi ni'i ta'u

ni ja vi sa'a jajin ni, chi nuu maa Jesukristu ka jinokuechi ni. ²⁵ Su ñayiu sa'a jakue'e, chi suni ni'i ya'ui nuu ia Dios jin jakue'e ni sa'i yun, chi tu sa'a siin siin ya ñayiu, chi inuu ni sa'a ya jin ndi'i.

4

¹ Te maa ni ja ka kuu ni jito'o, vi sa'a va'a ni vi sa'a ndaa ni jin ñayiu ka jinokuechi nuu ni, chi suni ka jini ni ja ka jinokuechi ni nuu in Jito'o oo ndee andivi.

² Te ndi'i maa ni, siun ni vi kondakuatu ni nuu ia Dios, te ma vi kusun ini ni, chi vi ndakuanta'u ni nuu ya. ³ Te suni vi ndakuatu ni ja ja'a san, nagua ja na kune ia Dios ichi ja na kuu vi ndakani san tno'o maa ya, ja na vi kuni ñayiu tno'o ni oyu'u ja kuu maa Kristu, chi siki tno'o ya'a kuu ja ndesi san vekaa. ⁴ Te vi kakanta'u ni nagua ja na kuu ka'an kaji kaji san tno'o ya nagua kuini ja ka'an san. ⁵ Te vi koo ndichi ini ni nuu ka jika ni jin ñayiu tu ka kandija, te vi kaxtno'o ni tno'o ya nui ndi'i ni jichi ja kuu vi ka'an ni jin. ⁶ Te ndi'i ni jichi ja ka ka'an ni, vi ka'an vii vi ka'an va'a ni jin ñayiu yun, na kuinio ndei ja ni kuu asin nuu ni kee ñii, nagua ja saa te vi kuni ni naxa vi ka'an ni nuu ka jikan tno'o ña in in ñayiu.

Ya'a kuu tno'o sandi'i ni ka te saa ka'on

⁷ Tetniuu san ñanio Tíquico, tee ka'an too san, nagua ja ndakani de nuu maa ni ndi'i naxa oo san. Suu de kuu in tee ndaa ja ka jinokuechi san jin de nuu Jito'o. ⁸ Te tetniuu san de nuu in in maa ni ja ndakani de nagua ja vi kuni ni naxa ka oo san, te ndataa de tno'o ndee ini. ⁹ Te suni

tetniiu san de jin ñanio Onésimo ja ka'an too san de. Suu de kuu in tee ndaa, in tee ñuu maa ni, te vi ndakani de ndi'i naxa ka ndo'o san ya'a.

¹⁰ Te ndakantno'o ndeva'a ña Aristarco, tee ka ndeka tna'a jin san ja ka yi'i san vekaa, a kukueni ka oo ni. Te suni saa ndakantno'o ña Marcos ñani xtoo xixi Bernabé. Te ja ni kaxtno'o san nuu in in maa ni ja ja'a Marcos, te nuu ja kenta de ja jakoto ña de, te vi kuenta'u ni de. ¹¹ Te suni ndakantno'o ña Jesús, tee suni nani Justo, te maa ni tee ya'a ka kuu tee judio ja ka chituu ña ja ka kaxtno'o san ja jitenuu tno'o nuu kua'a ñayiu naxa tatnuni ia Dios, te ka ndataa de tno'o sii ini nuu san. ¹² Te ndakantno'o ndeva'a ña Epafras a kukueni ka oo ni. Suu de kuu in tee ñuu maa ni, ja jinokuechi de nuu Kristu. Te siun ni jikanta'u de ja ja'a in in maa ni nuu ndakuatu de nagua ja vi koyutnu ni, ja tu nagua ka'ni ña, nagua ja kuu vi kuni ni ndi'i nagua kuini ia Dios. ¹³ Chi ndakani ndaa san ja ndi'ni ndeva'a ña Epafras jin in in maa ni vi ñayiu ka kandija ja ka oo ñuu Laodicea vi ñayiu ka kandija ja ka oo ñuu Hierápolis. ¹⁴ Te suni ndakantno'o ndeva'a ña tee tatna Lucas ja ka'an too san de, a kukueni ka oo ni, vi suni ndakantno'o ña Demas. ¹⁵ Te vi ndakantno'o ni ñayiu ka skua'a ja ka oo ñuu Laodicea a kukueni ka oi. Te suni vi ndakantno'o ni a kukueni ka oo Ninfas jin ñayiu ka skua'a ja ka ndututu ve'e de.

¹⁶ Te nuu kenta tutu ya'a, te vi ka'u ni nuu ñayiu ka skua'a jin ni, te vi ndatetniiu ni na ki'in ja vi ka'u ñayiu ka skua'a ja ka oo ñuu Laodicea. Te tutu ja ni tetniiu san ñuu Laodicea

yun, nuu vi ndatetniuu de nuu ni, te vi ka'u ni nuu ñayiu ka skua'a jin ni. ¹⁷ Te vi kuña'a ni sua'a nuu Arquipo: “Kachi Pablo ja nduku ndee ni ja skunkuu ni tniuu ni skuiso siki ña Jito'o jin ni”

¹⁸ Te jin nda'a maa san ja kuu san Pablo tee san tno'o ya'a, ja ndakan tno'o ña san, ¿a kukueni ka oo ni? Te vi kona'a ni ja oo san vekaa. Te ia Dios na koto na kuni ña jin ndi'i ni.

Saa na kokuu.

Tutu ii - Ka'an ia Dios nuu ndi'i ñayiu
Mixtec, Northern Tlaxiaco: Tutu ii - Ka'an ia Dios
nuu ndi'i ñayiu New Testament+
La Santa Biblia en el mixteco del norte de Tlaxiaco
copyright © 2016 Wycliffe Bible Translators, Inc.

Language: Mixtec, Northern Tlaxiaco

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022

1d46d274-fabd-5c6b-bfec-c3e776510466